

**SPR Perkenal Sistem Biometrik Untuk Atasi Isu Pengundi Hantu
Bernama
Julai 25, 2011**

KUCHING: Suruhanjaya Pilihan Raya (SRP) akan memperkenalkan sistem biometrik untuk memantapkan lagi tahap keselamatan dalam proses pilihan raya di negara ini.

Pengerusinya Tan Sri Abdul Aziz Mohd Yusof berkata antaranya pelaksanaan sistem itu diharap dapat mengatasi isu pengundi hantu yang sering dibangkitkan pihak pembangkang setiap kali menjelang pilihan raya.

"Dengan adanya sistem biometrik ini, ia akan dapat membantu mengelak seseorang individu ataupun pengundi itu membuat pembuangan undi dua kali," katanya pada sidang media, di sini Isnin.

Beliau berkata sistem tersebut akan diuji di beberapa kawasan untuk memastikan ketepatan dan keberkesanannya sebelum dilancarkan secara rasmi pada pilihan raya umum akan datang.

Abdul Aziz berkata sistem tersebut telah diguna pakai oleh beberapa agensi kerajaan seperti Polis Diraja Malaysia (PDRM), Jabatan Imigresen dan Jabatan Pendaftaran.-

BERNAMA

Hakcipta Terpelihara © 1995-2011 Star Publications (Malaysia) Bhd

Source: http://mstar.com.my/berita/cerita.asp?file=/2011/7/25/mstar_berita/20110725173406&sec=mstar_berita